

2023-mut Nunatta Karsiata naatsorsuutaasa akuerineqarnissaannik siunnersuut

(Aningaasaqarnermut Akileraartarnermullu Naalakkersuisoq)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerinnineq

Naalakkersuisut sinnerlugit Kukkunersiuinermit Ataatsimiititaliaq 2023-mut Nunatta Karsiata Naatsorsuutaanut isumaliutissiissusiorneranut qujassuteqarfigerusuppara. Ataatsimiititaliap isumaqatigiittup 2023-mut Nunatta Karsiata Naatsorsuutaasa akuerineqarnissaannik aalajangiiffisassatut siunnersuutip akuerineqarnissaannik inassuteqarnerat, Naalakkersuisut iluarisimaarpat.

Ukiut siuliinit kukkunersuisut oqaaseqarfigisaasa marluk 2023-mi naammassineqarsimanerat Naalakkersuisut ajunngitsutut isigaat, soorluttaaq ukiumut pineqartumut nutaanik kukkunersuisut oqaaseqaateqarsimannginnerat ajunngitsuusoq.

Kukkunersiuinermit Ataatsimiititaliap isumaliutissiissummini Nunatta Karsiata Kukkunersuisuata kaammattuutai misissorpai, immikkoortunillu eqqumaffigineqartussanik saqqummiussilluni. Kukkunersiuinermit Ataatsimiititaliaq ilanngussaq 1-imi oqaatigisanik kaammattuutinillu arlalinnik saqqummiussivoq. Oqaatigisat kaammattuutillu tamakkerlugit Naalakkersuisut matumani akissummi oqaaseqarfigisinnaanngilaat, taakkumi annertunerusumik oqaaseqarfiginagit tusaatissatut tiguneqarmata.

Kukkunersuisut Deloitte 2024-mut Nunatta Karsiata Naatsorsuutaanik kukkunersuisussatut Ataatsimiititaliap innersuussutigai. Tassani 2025-mut Nunatta Karsiata Naatsorsuutai pineqartut, Naalakkersuisut tunngavissaatippaat.

Kukkunersuisut Deloitte 2022-mut Nunatta Karsiata naatsorsuutaasa akuerineqarneranni 2024-mut Nunatta Karsiata naatsorsuutaanik kukkunersuisussatut toqqarneqarput. Kukkunersuisut Deloitte 2025-mut Nunatta Karsiata Naatsorsuutaanik kukkunersuisussatut toqqarneqarnerat Naalakkersuisut ilalerpaat.

Naggasiullugu Kukkunersiuinermit Ataatsimiititaliaq isumaliutissiissusiornermini annertuumik suliaqarneranik qutsavigerusuppara.

Taama oqaaseqarlunga siunnersuutip Inatsisartunut inaarutaasumik aappassaaneerineqarnissaa suliaassanngortippara.